

佛说甚深大回向经

刘宋失译师名出佑公录



南無本師釋迦牟尼佛

说 明

本简体校正版《佛说甚深大回向经》电子书，根据《乾隆大藏经》第47册，第0467部，大乘单译经部《佛说甚深大回向经》原龙藏雕板印刷影印本校正。句读仅作参考。特此说明。

仁慧草堂

二〇一七年十月

● 起诵仪

香赞

(一编)

炉香乍爇. 法界蒙熏. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

开经偈

(一编)

无上甚深微妙法 百千万劫难遭遇
我今见闻得受持 愿解如来真实义

佛说甚深大回向经

刘宋失译师名出佑公录

如是我闻：一时，佛在舍卫国祇树给孤独园，与大比丘众八千人俱。

尔时，世尊与诸大众前后围绕，而为说法，于是会中有一菩萨，号曰明天，即从座起，偏袒右肩，右膝着地，恭敬合掌，前白佛言：“世尊！欲有所问，惟愿世尊分别解说。”

尔时，佛告明天菩萨摩訶萨：“善男子，欲有所问，莫得疑难，如来当为随问解说。”

明天菩萨即白佛言：“云何菩萨少修善本而获大果，成多作功德，福报无量？”

佛告明天菩萨摩訶萨：“善哉！善哉！明天，能于佛前问如是义。汝已曾于过去无量诸佛所植众德本，供养诸佛，亲近善知识，能为乐福众生发甚深问，谛听谛听，善思念之。”

明天菩萨白佛言：“世尊！唯然，受教。”

佛告明天：“诸菩萨摩訶萨当于过去、当来、今现在诸佛所，修慈身行，修慈口行，修慈心行，专心念佛所行功德。复次，明天，菩萨摩訶萨当应往诣如来尊庙，礼拜供养，右膝着地，合掌右

绕，散华烧香，悬缯幡盖，作众妓乐，尊重恭敬，以微妙音歌、甚深句义，赞佛功德，随喜叹善。”

佛告明天：“云何菩萨摩訶萨于过去、当来、今现在诸佛所，修慈身行，修慈口行，修慈心行，念佛功德？善男子，菩萨摩訶萨当念如来、坚固士、无上士、最胜士为狮子王，勇猛无畏，自度度彼，自安安彼，自灭灭彼，说真谛法，安立众生，心无谄饰，净戒具足，力无畏辩，永除障习，于法自在，无与等者。如是专心念佛功德已，右膝着地，散华烧香，旛缯幢盖，妓乐供养，是为菩萨修慈身行。以微妙音歌、甚深句义，赞叹如来无量功德，是为菩萨修慈口行。因彼身、口善根念佛功德，至诚恭敬，是为菩萨修慈心行。明天，是则菩萨摩訶萨于过去、当来、今现在诸佛所，修慈身、口、意，习行正念。”

佛复告明天：“又，菩萨摩訶萨于过去、当来、今现在诸众生所，亦应修慈身行，修慈口行，修慈意行，等念众生。明天，云何菩萨摩訶萨于三世众生所，应修慈身、口、意行，等念众生？如是，明天，菩萨摩訶萨不杀众生、不盗他财、不邪淫、不妄语、不绮语、不两舌、不恶口、不贪欲、不瞋恚、不邪见。云何菩萨不杀众生？于

一切众生慈悲爱念，惭愧愍伤，永舍刀杖。不偷盗者，若于聚落空处所有遗物，不与不取。不邪淫者，若女有主、父母、兄弟、宗亲所护，乃至见彼，授华一茎，不起欲想。不妄语者，若于乡邑，若在王者，堪为证佐，真诚实语，守死不虚。不两舌者，常于彼此起和合想，从彼所闻，不向此说；从此所闻，不向彼说。不恶口者，软语开喻，先意问讯，终不以苦切恶言加于众生。不绮语者，时说，实说，知义而说，为利益彼说，心口无差。不贪著，于他财利不起欲想，见来取者心无恠惜。不瞋恚者，于一切众生除诸恚恨，起慈愍心、饶益心、安彼心，随顺善摄一切众生。不邪见者，有施，有济，有说，有父母，有今世后世，有苦乐行果报，世间有阿罗汉，自知身作证：我生已尽，梵行已成，所作已办，自知不受后有。明天，当知彼不杀、不盗、不邪淫则是菩萨修慈身行；不妄语、两舌、恶口，不绮语则是菩萨修慈口行；不贪、不恚、不邪见则是菩萨修慈意行。修慈身、口、意，则是菩萨等念众生。”

佛告明天：“菩萨摩訶萨于过去、当来今现在诸佛所，修慈身行，修慈口行，修慈意行；及于过去、当来、今现在一切众生所，修慈身行，

修慈口行，修慈意行。所有功德果报，悉与一切众生共，回向阿耨多罗三藐三菩提。明天，菩萨作如是回向者，是为菩萨少修善本获大果报，多作功德，福报无量。”

佛告明天：“是菩萨成就无量功德时，持是功德回向无量智慧，又共一切众生，尽回向阿耨多罗三藐三菩提，是功德三种，有三种回向。何等为三？谓过去空，当来空，现在空；无有回向者，亦无回向法，亦无回向处。菩萨摩訶萨当作是回向，作是回向时，三处皆清净，以此清净功德与一切众生共，回向阿耨多罗三藐三菩提。作是回向者，无有凡夫及凡夫法，亦无信行，亦无法行，亦无八人，亦无须陀洹、向须陀洹，亦无斯陀含、向斯陀含，亦无阿那含、向阿那含，亦无阿罗汉、向阿罗汉，亦无辟支佛、向辟支佛，亦无有佛及向佛者。何以故？法性无缘，不生不灭，无所住故。是故，菩萨摩訶萨应以是三种回向、三种清净功德，与一切众生共，回向阿耨多罗三藐三菩提。是菩萨作是回向已，又复愿言：

‘若我生处，常遇诸佛，逮甚深三昧，见无量佛，成就多闻清净智慧，弘誓不舍一切众生。’”

说是法时，百千天人皆愿欲往生阿閼佛国。

尔时，佛告尊者阿难：“我向说此甚深法时，百千天人皆愿往生阿閼佛国。阿难，当知彼于此终，皆当往生阿閼佛所妙乐国土，从一佛国至一佛国，供养诸佛，听受正法，得陀罗尼，如说修行，皆当成就不思议慧，于五浊国当得作佛，皆同一号，号甘露音王如来、应供、等正觉，当知彼天受记莳时，百千众生皆发阿耨多罗三藐三菩提心。”

尔时，释提桓因白佛言：“世尊！如我解佛所说义，当知此为大功德趣，为无量功德，为无边功德。”

佛言：“憍尸迦，是法毕竟净故。”

“世尊！当何名此经，云何奉持之？”

佛告释提桓因：“憍尸迦，是经名大回向，亦名甚深法性回向，当奉持之。”

佛告憍尸迦：“若有善男子、善女人，学是回向者，当知是人必逮得无所从生法忍，能度未度者，安乐百千无量众生。”

说是法时，诸比丘众、释、梵、天、人、阿修罗等，闻佛所说，欢喜奉行。

《佛说甚深大回向经》卷终

● 结诵仪

补阙真言

(三编)

南無喝啰怛那. 哆啰夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛那. 吽. 泼抹拏. 娑婆诃.

三皈依

(一编)

自皈依佛，当愿众生，体解大道，发无上心；
自皈依法，当愿众生，深入经藏，智慧如海；
自皈依僧，当愿众生，统理大众，一切无碍，和南圣众。

南無佛 南無法 南無僧 (合掌三称)

南無一切如来、应、正等觉 (合掌三称)

南無本师释迦牟尼佛 (合掌三称)

南無观世音菩萨摩诃萨 (合掌三称)

回向偈

(一编)

诵经功德殊胜行 无边胜福皆回向
 普愿沉溺诸有情 速往无量光佛刹
 十方三世一切佛 一切菩萨摩诃萨
 摩诃般若波罗蜜

回向偈

(一编)

愿以此功德 庄严佛净土
 上报四重恩 下济三途苦
 若有见闻者 悉发菩提心
 尽此一报身 同生极乐国



此咒置经书中可灭误跨之罪

南无护法韦驮尊天菩萨

